

Un sogno di PASQUA


(marzo 2016)

A l'è Pasqua e ho vorù 'ndà al cimiteri
A troà i me gent, giust 'me l'è 'l me doeri.
Al me paes l'è no distant de la gesa,
On tochel de strada ' pena ' pena in discesa.
Quater pass e s'eri quasi 'rivàa
Che i campan s'in metu 'drèe a sonà.
A l'è Pasqua ! L'è risort el Signor !
Che aria fresca e 'me profumen i fior !

Voltà l'angol el camposant l'era là
Oh! A som stà lì a boca 'verta incantàa :
Tomb e crus eren tuti spari,
Al so post on pra verd e fiorì.
'Pena sora sonava 'n 'orchestra
E cori d'angiol faseven gran festa
On sac de gent in girotond la balava
La sorideva e intant la cantava.
E poeu ... tei lì, tei lì la mia mama e 'l papà
'Me du morosit brascià su a balà
E fradei e amis e parent
E 'dré de lor : 'na marea de gent !

Mi, commos, a piangevi e g'ho dì :
" 'Me l'è bel, cara gent, tirem lì !...,,
" No - m'han rispost - te minga patì assé
Al to moment, alora sì te vegnaré...,,,

L'era propi on bel sogn, poeu me som desedà
Ma, se 'l Signor l'è risort, l'è la pura verità !



Don Arnaldo